

每週經課朗誦經文(巴克禮台語漢字)2015/09/27

共同經課 - 1 以斯帖記七章一節~六節、九節~十節、九章二十節~二十二節

1 王及哈曼來赴王后以斯帖的筵席。2 此個第二日王佇酒筵席的中間，閣問以斯帖講：「王后以斯帖啊，你所請是甚麼，欲互你；你所求是甚麼，就國的一半也欲做成伊。」3 王后以斯帖應講：「王啊，我若得著恩典佇你的目矚前，王若掠做好，就願你允我所請，用我的生命互我；允我的所求，用我的宗族互我。4 因為我及我的宗族受賣，欲剿滅剗死阮互阮死無。設使賣阮做奴僕做奴婢，雖然對敵袂會補王的損失，我也靜靜。」5 亞哈隨魯王應王后以斯帖講：「敢存心做此個事的是是誰？彼人佇叨落！」6 以斯帖講：「仇讎對敵就是此個歹人哈曼！」哈曼佇王及王后的面前就真驚。9 伺候王的太監有一個名叫哈波拿，講：「看啊，哈曼為著末底改倚一個五十肘高的柴架，末底改就是前日用盡忠的話報王的，今彼個架倚佇哈曼的家。」王講：「吊伊佇彼頂面。」10 人就吊哈曼佇伊給末底改所備辦的柴架頂。王的受氣才息。20 末底改記載許個事，閣寫批互亞哈隨魯王逐省遠近所有的猶大人，21 定著 in 逐年著守亞達月十四、十五二日，22 此二日是猶大人脫離對敵得著平安的日，彼月是憂悶變做歡喜，悲哀變做好的日。也著守此二日做設筵席歡喜，大家用禮物相送，賑濟喪鄉人的日。

共同經課 - 2 詩篇一百二十四篇

1 〔上崎仔的詩，大衛所做。〕以色列今著講：若嘔是耶和華助阮，2 若嘔是耶和華助阮，佇人起來攻擊阮，3 佇 in 對阮發受氣的時、就將阮活活吞落去。4 彼時，諸個水的確搬(pôaⁿ)過阮，河水的確淹密阮，5 兇狂的水的確淹密阮。6 願耶和華受謳啫！因為伊無將阮做食物交互 in 哺食，7 阮的生命親像鳥仔，脫離掠鳥的羅網；羅網破裂，阮就脫離。8 阮得著幫助，是靠耶和華的名，伊是創造天地者。

共同經課 - 3 雅各書五章十三節~二十節

13 恁中間有人受苦嗎？伊著祈禱；有人歡喜無？伊著吟詩。14 有人破病無？伊著叫教會的長老；佇主的名用油抹伊，近倚伊來祈禱。15 有信的祈禱欲救破病的人，主欲互伊起來；伊若有罪，欲赦免伊。16 恁著相對認罪，相替祈禱，通得著醫好。義人的祈禱，伊的力量有大功效。17 以利亞是及咱同情的人，伊切切求莫得落雨，就無落雨佇地裡歷過三年閣六月日。18 伊閣祈禱，天就落雨，地就出土產。19 我的兄弟啊，恁中間若有失迷真理的，有人互伊越轉，20 通知互一個罪人對迷路倒轉的，會救伊的靈魂出死，閣會遮蓋多多罪過。

共同經課 - 4 馬可福音九章三十八節~五十節

38 約翰給耶穌講：「先生，阮曾看見一人用你的名趕鬼，阮就禁止伊，因為伊無隨咱。」39 耶穌講：「莫得禁伊；因為無有人奉我的名行權能，也會連鞭誹謗我。40 見若無攻擊咱的，就是為咱。41 見若因為恁屬基督，就用一杯水互恁飲的，我實在給恁講，伊將來無失落伊的賞。」42 「見若互諸個信我的微細的一個去犯罪，彼人寧可受大石磨縛伊的頷頸，穴佇海裡。43 設使 44 你一手致到你犯罪，就著斬斷伊；你寧可破相入佇活，莫得二手去地獄，入袂熄的火。45 設使你一腳致到你犯罪，就著斬斷伊；46 你寧可跛腳入活，莫得二腳受穴落地獄。47 設使你一目致到你犯罪，就著挖去；你寧可一目入佇上帝的國，莫得二目穴落地獄。48 佇遐，in 的蟲無死，火無熄。49 因為逐人欲用火來歧伊。50 鹽是好，鹽若失落伊的鹹，欲用甚麼來復倒伊的味？恁的內面應該著有鹽，也大家著相和好。」